



Revitalisacion di Rancho por yuda Oranjestad lanta cabes

AUDREY Lacle, President di MAMBO, a forma parti di e delegacion cu a compaña Prome Minister Mike Eman diasabra mainta den un recorrido di bisindario di Rancho. Na final, e lider comercial a expresa su conclusion di e bishita y kico por ta expectativanan. E ta di opinion cu e comunidad ta cla y tur costa na su luga pa cuminsa tuma pasonan concreto. E revitalisacion di Rancho por ta un 'asset' pa centro di ciudad, den su totalidad, por lanta cabes. Desaroyo comercial y social por bay man den man y e tin confianza cu actualmente tin e personanan adecua pa realisa esey.

Personalmente Lacle a presencia e contacto cu Prome Minister Mike Eman ta establece cu e diferente figuranan di e bario. E mandatario a combersa cu comerciante di e area, como por ehempel Kishor Karnani, kende a muestra su iniciativa y plan di inversion. Karnani ta bay construi un edificio di apartament di luho riba J.G. Emanstraat.

Di mesun manera, Minister President a papia cu e diferente bisifianan y ademá di reitera e intencion firme di Gobierno pa mehora e area, tambe a sa di tende di nan necesidad y deseonan.

"Prome Minister a duna nan e siguridad cu ta bay bin un luga decente pa biba, un luga pa adictonan ambulante cu

ta molestia e comunidad den rancho," asina Lacle a conta. E ta forma parti di un grupo di 20 instancia, incluyendo Monumentenfonds, Polis y Dienst Besmettelijke Ziekten, entre otro cu ta sinta pa analisa e situacionnan cu ta rekeri atencion y bin cu plannan pa mehora esaki. "Hendenan ta cansa di loke ta pasando den e bario y e cambio ey ta loke nos ta aki awe pa sostene."

Lacle a expresa cu e ta sinti con e direccion y impresion cu nan ta haya awo ta mas receptivo. Loke kier awo ta pa sinta na mesa y papia e cos concreto: Kico lo wordo cumpra, kico FCCA su papel den e proyecto aki lo ta y con e hende nan bida lo por cambia.

"No solamente nan como ciudadano di e bario, pero tambe pa e comunidad cu kier bishita, paso Rancho tin hopi monumento, hopi cas cu por drecha hopi leuk." E ta admiti cu ta trata aki di algo costoso cu lo bay den fase, pero ta sumamente esencial pa duna e prome stap, pasobra mientras tanto ta kibra e moral di e hendenan cu ta biba akinan.

"E ta un mainta cu nos no

a perde nos tempo. Prome Minister a papia cu e habitantenan y a tende kico nan ta desea pa nan bario," asina Audrey Lacle a declara. Na su opinion, Emanstraat por ta un borderline importante. E otro cayanan por cria sfeer cu ta un asset pa yuda Oranjestad lanta cabes.

Si tin mas cos di ofrece, esaki ta bira mas interesante y asina turistanan ta bishita ciudad. "Esey ta loke nos kier captiva drechando e bario."

E ta wak Rancho como un area mixto caminda lo tin casnan, pero tambe un area comercial basa riba micro comercio, kier men cu negoshinan den casnan mes, cu por ehempel cosnan traha na Aruba. "Si cada ken

eherce nan profesion y e arte cu nan ta haci dor di traha souvenir, cosnan di Pasco original, cumindanan tipico, cafe y luganan pa sinta; por ta te hasta un clubhuis chikito caminda hendenan grandi por sinta hunga domino. Bo tin cu pensa 'out of the box'."

Finalmente, e President di MAMBO ta kere cu Gobierno ta conta cu e hendenan adecua pa cumpli cu su vision di revitalisa henter centro di ciudad. "Nos tin e hendenan cu sa exactamente kico nos kier haci.

Nos no kier haci 'copy paste' di un otro caminda, nos kier tin nos mesun originalidad y mi ta kere nos tin e hendenan adecua pa hacie. Sigur cu si!"

